

Tjukurpa Esther-nyatjara

Esther

Nyangatja Ngañmanytju

Nyakula Wangkanytjaku

Nyangatja Godaku tjukurpa kungkawara Jew ini Esther-nyatjara. Palu paluru Israelta wiyangka manta kutjupangka nyinangi ini Piplaniyalá, panya iritiya ngura nyara palunya ngurara tjuta warmala pitjangu manta Israeltakutu munuya Jew panya tjuta mulapa pungkula iluntanu, munuya tjara kutjupa Esther-ku tjamupiti kulu witira malakungku katingu tjanampa ngurakutu parari mulapa. Ka ngula Esther-nya ngura nyara palula iti ngaringu ngura malikitjangka tawunu ini Tjuutjala, palu paluru tjitji kułunypa tjitularingu, ka palumpa kułangku wati ini Mutukailu palunya atunytju kanyira pułkanu palumpa ngurangka.

Ka paluru pułkaringkunyangka Puutjuku mayatja pułkangku palunya ngurkantara altingu munu palunya tjunu palula itingka mayatja tjuta nyinanytjaku. Ka ngula wati kurangku wituwituń mayatja panya pułka Jew tjuta iluntankunytjaku Esther-ku panya walytja tjuta. Ka Esther-lu rapangku mayatja panya palula anga-wangkangi palumpa walytja tjuta wankarunkunytjaku, ka mulapańtju tjananya wantingu kaya wankaringu.

Tjukurpa nyanga palulangurula kulini mulapa

Godalu palumpa walytja tjuṭa aṭunymara kanyilpai.

[Tjukurpa nyanga paluru mutumutuntja ngaranyi, uwankara wiya. Palu ngulaya tjukurpa winki palyalku.]

Tjukurpa nyanganpa ngarinyi:

1:1—2:23 Puutjuku mayatja pulkangku mai pulka palyantja

3:1 —5:14 Wati kurangku anangu Jew uwankara pungkula wiyanjtjikitja mukuringkunytja

6:1—8:15 Esther-lu mayatja panya pulkangka anga-wangkara palumpa walytja tjuṭa wankarunu

8:16 —10:3 Mayatja pulkangku Esther-ku pukularira mai pulka palyantja

1-22 Iriti wati ini Tjuukitjinya mayatja pulka mulapa nyinangi ngura tjuṭa mularku. Munu paluru tawunu ini Tjuutjala nyinara ngura palunya tjananya kanyiningi. Munu tjintu kutjupa paluru anangu winki altingu palumpa ngurakutu mai pulka pitjala ngalkuntjaku tjintu tjuṭa. Kaya anangu tjuṭa mulapa pitjangu munuya pulka ngalkula tjikiningi. Ka mayatja paluru palumpa kuri wangkangu mantara wirungka tjarparda palula tjungu pitjala ngaranytjaku anangu tjutangku nyakunytjaku. Palu paluru pitjanytja wiyangku wantingi. Ka mayatja panya paluru palumpa kuriku pulkara mirpanaringu munu palunya painu munu kutjupa altinytjikitjangku nguriningi.

2

1-7 Munu paluru watı warka tjuta witunu kungkawara tjuṭa utulura palulakutu katintjaku tjanalanguru kungkawara kutju palumpa ngurkantankunyjtikitjangku.

Ka Esther-nya kungkawara nyara palula tjanala tjungu pitjangu. Ka Esther-ku kuṭangku wati ini Mutukailu palula nganmanytju wangkangu, "Kulila, nyuntu panyan Jew mununku palula tjanala utintja wiyangku wantima." Ka paluru mulapa kutitjura wantingi utintja wiyangku.

8-23 Ka mayatjaku panya warkaripai tjutangku kungkawara palunya tjananya rawangku kanyiningi wali kutjupangka mayatjaku ngurangka itingka, munu tjintu kutjupa tjintu kutjupa tjananya rawangku miri wiruningi. Ka yiya kutju wiyaringkunyangka wati panya mayatjangku wangkangu palulakutu katintjaku kungkawara panya tjuṭa yunpa nyakula kungkawara kutju palumpa ngurkantankunyjtikitjangku. Munu wati paluru tjananya uwankara kutju kutju nyangangi munu Esther-nya nyakula ngurkantanu, panya paluru wiru mulapa ngaranyangka.

3

1-15 Ka mayatja panya pulkaku malpa nyinangi ini Aimannga. Ka mayatja paluru wati palunya mayatja tjunu palula itingka nyinanytjaku. Ka wati paluru mayatja pulkaku nguranguru ma-pakannyangka anangu tjutangku palunya pupakatira walkulpai. Palu wati panya

Mutukailu wantingi palunya walkuntja wiyangku panya paluru wati Jew munu kuliningi alatji, “Ngayulu Godanya kutju walkulpai.” Munu paluru pupakatinytja wiya ngarangi. Ka kutjupangku nyakula tjakultjunu wati panya Aimanta, “Wati nyara paluru Jew nyinara nyuntunya pupakatira walkuntja wiyangku wantipai.” Ka Aimantu nyangatja kulira Mutukaiku pulkara mirpañaringu munu paluru kuliningi, “Utila Mutukainya pungkula iluntanama palumpa walytja tjuta kuļu anangu panya Jew uwankara ngura winkingka manta nyanga Papilaniyalawanu nyinanyangka muñkara kuļu.”

Munu paluru ankula mayatja panya pulkangka wangkangu, “Kulila, anangu Jew winkiya nyangatja nyinanyi tawunu nyanga uwankarangka munuya wangañarangku kulintja wiya nyuntula. Wanyu tjakulpa tjuta iyala tawunu tjutakutu kaya nyuntumpa tjaultji tjutangka wangka Jew uwankara iluntankunytjaku.”

Ka mayatjangku kulira wangkangu palula, “Uwa, palya nyangatja nyuntu nyanga wangkanytja. Ka tjukurpa palunya nyiringka walkatjura munu anangu tjutakutu iyala.”

Ka Aimantu wati walkatjara tjutangka wangkangu nyiri tjutangka tjukurpa walkatjunkunytjaku wangka kutjupangka kutjupangka alatji,

“Jew uwankaraya tjintu kutjungka iluntanama wati, minyma, tjitji kuļu, kutju wanka kanyintja wiyangku. Munuya tjana kanyintja uwankara mantjinma kutjupa kutjupa wiru tjuta.”

Munu paluru tjintu kulu walkatjunkunytjaku wangkangu panya tjaultji tjutangku tjananya iluntankunytjaku. Munuya walkatjura wiyingkula mayatja panya pulkaku ini tjaru walkatjunu munuya mayatjaku ringi kitji purunytja tjalatjura nyiringka walka tjampamilañu anangu tjutangku nyakula mulamularingkunytjaku. Munuya wati tjakulpa tjuta ungu ngura uwankarakutu katira anangu tjutangka nintintjaku. Ka tjakulpa kutjungku ngura pala Tjuutjala tjukurpa panya palunya nyakula wangkangu anangu tjutangku kulintjaku.

4

1-17 *Ka Mutukailu lita panya mayatjangku walkatjunkunytja kulira pulkara tjiturutjitururingu munu mantara palurunku kañantara aranu mununku tjunpangka puntu winki nyitira mantara walyku-walykungka tjarpara iwarangka para-ngarala pulkara ulangi, panya tjakaya tjituru-tjituru ngarala alatjinkupai.*

Ka kungkawara Esther-ku warkaripaingku nyangu wati palunya para-ngarala ulanyangka munu ankula Esther-la tjakultjunu. Ka paluru kulira urulyarara pulkara nguluringu munu kungkawara kutju mantara ungu katira Mutukainya ungkunytjaku. Palu wati paluru ungkunyangka mantjintja wiyangku wantingi.

Ka Esther-lu piruku wati warka witunu Mutukaila tjapira kulintjaku nyaaku paluru alatjirinyi. Ka paluru ankula tjapinu.

Ka Mutukailu tjakultjunu tjukurpa uwankara munu lita panyatja kulu ungu Esther-nya ungkunytjaku panya mayatjangku palyanmankula ungkul'iyantjanya, munu wati panya warka witunu, "Ankula Esther-la wangka, ka paluru ankula mayatja panya pulkangka anga-wangkara pulkara ngatjila nganampa ngalturingkunytjaku Jew panya tjutaku."

Ka wati panya warka paluru anu malaku piruku Esther-lakutu munu wangkangu palula uwankara panya Mutukailu wangkanytja munu nintinu nyiri panya mayatjangku walkatjunkunytja. Ka Esther-lu nyiringuru nyakula wiyingkula wangkangu, "Ankula alatji wangka Mutukaila, 'Ngayulu mayatjakutu putu ananyi, panya paluru altinyangka kutju anangutu kutjupa tjarpapai palunya nyakunytjikitja. Palu paluru altinytja wiyangka putu tjarpanyi walytjangku kulira. Nyangatja palumpa ara. Tjinguru ngayulu altinytja wiyangka watarku tjarpampa ka ngayunya iluntankuku. Panya paluru kutjungku kutjupa-ara palumpa tjukara purunypa gold-nguru palyantjita witira katulpai, ka nyara paluru nintilpai anangungku nyakula ngurkantankunytjaku munu tjarpanytjaku. Kulila, ngayulu panya palunya nyakunytja wiya alatjitu nyinangi pira kutju, panya paluru ni altinytja wiyatu. Kana putu ananyi palulakutu.' Alatji Mutukaila ankula wangka."

Ka ankula wangkanyangka Mutukailu kulira piruku wangkara wati panya warka iyanu Esther-lakutu alatji wangkanytjaku, "Kulila! Nyuntu tjinguru kulini mayatjaku ngurangka

pala nyinara wanka nyinanytjikitjangku-palku, palu wiya. Nyuntu panya Jew, kantaya nyuntunya kuļu iluntankuku nyuntu nganampa angawangkawayangku wantinyangkampa. Palya kutjupangkuntilanya ngula ngalkilku, palu nyuntu nganana kuwari iluku ngalimpa walytjapiti uwankara. Palu kulila, Godalunta nyuntunya tjunu kuwari nyanga mayatja nyinara nganampa anga-wangkanytjaku alatjitu.”

Ka Esther-lu nyangatja kulira wati panya warkaripai piruku iyanu Mutukailakutu nyanga alatji wangkanytjaku, “Anangu Jew tjuta ngura nyanga Tjuutjala nyinanyangka altira utulura munu tjananya wangka mai ngalkuwiya nyinanytjaku tjintu mankurpa tjana kulira ngayuku Godala tjapintjikitjangku. Ka ngayulu kuļu palu purunypaṭu mai wiya nyinara Godala pulkara tjapilku. Mununa palulanguru mayatja panya pulkakutu ankuku. Kanī tjinguru nyakuku, munta tjinguruṇi iluntankuku.”

Ka Mutukailu mulapaṭu palyanu uwankara Esther-lu wangkanytja.

5

1-8 *Munu palulanguru Esther-nya tiritja wiru mulata tjarpangu, munu ankula mayatjaku ruumangka itingka uti ngarangi tuwa alangka paluru nyakula altinytjaku. Ka wati panya mayatjangku palunya nyakula pukularingu munu puṇu panya tjukara purunypa gold-nguru palyantjitia katunu paluru tjarpantjaku. Ka Esther-lu nyakula ngalya-tjarpangu munu puṇu panya*

tjukara purunypa paluru katura kanyintjanya ankala pampunu.

Ka mayatjangku panya palula tjapinu, “Nyaaringun? Nyaakun mukuringanyi? Nyuntu mukuringkunyaŋkaña nyuntunya tjarara pulka mulapa ungkuku ngayulu kanyintjatjanungku.”

Ka Esther-lu wangkangu, “Wanyu nyuntu pitjaku kuwari panya ngayulu mai pulka palyara wantingu nyuntu nganana ngalkuntjikitjangku. Ka wati panya Aimannaŋga kuļu ngalya-katima nyuntula tjungu.”

Ka nyanga palunya kulira Mayatja panya pukularingu munu wati palumpa warkangka wangkangu, “Ankula Aimannaŋga warpungkula alti, kali paluru ngali ara Esther-ku ngurakutu mai ngalkuntjikitja.”

Ka mulapaŋu ankula altingu wati palunya. Ka pula tjunguringkula anu Esther-ku ngurakutu munu pula mai wiru ngalkuningi palula tjunguringkula. Ka Mayatja panya pulkangku Esther-la tjapinu, “Nyaakun mukuringanyi? Nyuntu mukuringkunyaŋkampa ngayulu nyuntunya tjarara pulka mulapa ungkuku ngayulu kanyintjatjanungku.”

Ka Esther-lu wangkangu, “Ngayulu mukuringanyi nyuntu ngayuku pukuɻarinytjaku. Palu wanyu piruku pitja mungawinki mai kutjupaku Aimannaŋga nyupalitu. Kaŋanta nyara palulalta tjakultjunkuku ngayulu mukuringkunytja.”

9-14 *Ka pula mai ngalkula wiyarinkula anu ngurakutu. Ka Aimantu ngururpa nyangu wati*

panya Mutukainya nyinanyangka kaitangka itingka. Ka wati paluru Aimannga pitjanyangka nyakula pakara pupakatira wal kuntja wiyangku wantira alatjiitu nyinangi. Ka paluru pulkara mirpanaringu Mutukaiku, palu wangkanytja wiya tu katakutjara anu. Munu ngurangka wirkara altingu palumpa malpa tjuta munu minyma kuri kulu munu kañany-kañanytju alatjiitu tjanala tjakultjunangi panya mayatja pulkangku palunya mayatja nampa 2 nyinanytjaku tjunkunytja. Munu wangkangi, “Panya kuwari mayatjaku kur ingku mai palyara ngayunya kutju altingu mayatjangka tjungu ankunytjaku. Kali tjintungka piruku ananyi maiku. Palu anangu kutjungkuni tjituru-tjituru palyanu. Kana palumpa pulkara mirpanarinyi wati panya Jew ini Mutukaiku.”

Kaya palula wangkangu, “Uti nyuntu wati warka tjuta al̄tima, kaya pitjala puñu wara palyala ruupatjara anangu ruupangka liri karpira katunguru waraly-waralytjunkunytjaku. Munun mungawinki nyuntu mayatjangkalta wangka Mutukainya liringuru waraly-waralytjunkunytjaku. Munun pukulariralta ananyi maiku mayatjangka tjungu.”

Ka Aimantu unngu kulinu, “Munta-uwa, nyangatja wiru nguwanpa.” Munu wangkangu wati warkaripai tjuta, “Kuwariya puñu wara palyala anangu liri karpira katunguru waraly-waralytjunkunytjaku.”

6

1-14 *Ka munga nyara palula wati panya mayatja pulkanya puñu nguwanpa kunkunaringi.*

Munu paluru altingu wati warkaripai kutju munu palula wangkangu, “Nyuntu panya nyiringka walkatjunkupai nganana kutjupa kutjupa tjuta wangkanyangka munu palyannyangka kuļu. Wanyu nyiri panya palunya mantjila munu nyakula wangka kana kulila nyaaringangiya ngura nyangangka.”

Ka paluru nyiri panya palunya mantjinu munu nyakula wangkangi tjukurpa tjuta munu tjukurpa nyangangka wirkara wangkangu alatji,

“Wati kutjarangku pula mayatja panya pułka iluntankunytjikitjangku kuliningi. Ka wati ini Mutukailu nyanga palunya kulira ankula palula wangkara ngulutjunu.”

Alatji wati panya warkangku mayatja pułkangka wangkara utinu.

Ka mayatjangku wangkangu, “Munta-uwa panya wati nyanga paluruṇi wankakutunu. Kana nyaa palunya ngapartji ungu paluru ngayunya wankakutunyangka?”

Ka wati panya warkaripaingku wangkangu, “Wiya, nyuntu Mutukainya kutjupa kutjupa ngapartji ungkunytja wiyatū.”

Ka pula nyinara wangkanyangka Aimanna ngalya-tjarpangu mayatjaku walingka munu paṭara ngarangi, panya paluru pitjangu mayatjangka tjapintjikitja mungawinki Mutukainya waraly-waralytjunkunytjikitjangku. Ka wati warkaripaingku nyangu Aimanna munu wangkangu mayatjangka, “Aimanna nyangatja nyuntumpa paṭara ngaranyi.”

Ka wangkangu, “Palya, pitjanytjaku wangka.”

Munu palulanguru Aimannga pitjanyangka mayatjangku palula tjapinu, “Wati kutjuña pukulmankunytjikitja mukuringanyi mununa nyaalku?”

Ka Aimantu unngu alatji kulinungi, “Munta, Mayatjalu tjinguru ngayunya kulini pukulmankunytjikitjangku.” Munu wangkangu, “Uti nyuntu palunya tjarpatjunama nyuntumpa mantara wirungka munu nyuntumpa panya nyanytjungka tatitjura. Ka wati nyuntumpa warkaripaingku uti purala witirra katima iwara tjutangka anangu tjutangku nyakunytjaku, munu uti paluru anangu tjutangka parawangkama nyanga alatji, ‘Mayatja panya pulkanya wati nyanga palumpa pulkara pukularinyi munu paluru mukuringanyi nyura kulu palumpa pukularira palunya mirawaninýtjaku.’”

Ka mayatjangku kuliра Aimannga witunu, “Warpungkula ngayuku mantara wiru kati munu Mutukainya tjarpatjura munu nyanytjungka tatitjura iwara tjutangka kati munu anangu tjutangka tjakultjunama panya nyuntu wangkanytjanya alatjitu.”

Ka Aimantu wanganarangku kulinu mayatjangku wangkanyangka palu unngu paluru pulkara kunтарingu. Munu wiyaringkula paluru mapalku anu ngurakutu kata mantarangka tjutura panya paluru kuntaringu. Munu ankula warkaripai tjutangka palumpa kuringka kulu tjakultjunangi. Ka nyinara wangkanyangka mayatjaku wati warkaripai kutju wirkanu munu

wangkangu, “Wala pulka kunyu pitja maikutu, panya Esther-lu palyantja riti ngarinyi.”

7

1-10 *Ka Aimannga kulira anu munu mayatja panya pulkangka tjunguringkula pula wirkanu Esther-ku ngurangka munu pula tjarpara mai ngalkuningi palula tjunguringkula. Palu mayatjangku panya piruku tjapinu Esther-la, “Nyaakun mukuringanyi? Tjinguru nyuntu mukuringkunyaṅgaṅanta tjarara pulka mulapa ungkuku ngayulu kanyintjatjanungku.”*

Ka Esther-lu wangkangu, “Wirungkuni wanyu wankarura wanka nyinanytjaku, ngayuku walytja tjuta kuļu. Panya ngayulu nyiringka nyangu ngayuku walytja tjuta iluntankunytjikitjangku wangkanyta. Palu wanyulanya wirungku atunymara wanka kanyinma.”

Ka mayatjangku panya tjapinu, “Nganalu wanyu walkatjura iyanu nyuntumpa walytja tjuta iluntankunytjaku?”

Ka Esther-lu wangkangu, “Wati nyangangku. Nyanga paluru wati kura nganampa mirpantju.”

Ka Aimannga kulira pulkara nguluringu. Ka wati panya mayatja pulka palumpa pulkara mirpañaringu. Ka mayatjaku wati warkariipaingku wangkangu, “Nyaratja nyawa, puṇu nyara wara palyantja ngaranyi Aimanku walingka itingka. Nyara palulaya kunyu kuwari Mutukainya liri karpira katunguru waraly-waralytjunanyi.”

Ka mayatjangku wangkangu palumpa warkaripai tjutangka, “Wiya, wati nyanga palunya alatjitu ya utitjura nyara palula.” Kaya

mulapaṭu wati panya Aimannaŋga katira liri karpira katunguru waraly-waralytjunu, ka ilungu.

8

1-17 *Ka Esther-lu mayatja panya pulkangka tjakultjunu wati panya Mutukainya kutu palumpa nyinanyangka. Ka mayatja paluru Mutukainya altingu palulakutu pitjanytjaku, munu pitjanyangka paluru ringi palumpa manyirkanguru araltjara Mutukainya ungu palumpa pukularira. Ka Esther-lu mayatjangka pulkara ngatjiningi tjukurpa panya Aimantu walkatjura iyantja wiyanmankunytjaku panya paluru nganmanytju ngura tjutakutu iyanu. Munu wangkangu, “Wanyu tjukurpa kutjupa walkatjura munu Aimanku tjukurpa wiyala. Ngayulu mukuringkunytja wiya ngayuku walytja tjuta ilunytjaku.”*

Ka mayatjangku kulira wangkangu, “Palya nyupali tjukurpa kutjupa walkatjura, munu walkatjura wiyaringkula tjaru ngayuku ini walkatjura. Munu ringi ngayuku kitii purunytja tjalatjura nyiringka walka tjampamilala, munu pula Jew tjutakutu iyala tjana nyakunytjaku. Kaya ngayuku ini walka nyakula kulilku, ‘Munta-uwa, nyangatja tjukurpa mulapa mayatjangku panya iyantja, kala puṭu wantinyi.’”

Ka palulanguru Mutukailu mayatjaku panya warkaripai tjuta wangkangu tjukurpa nyiringka walkatjunkunytjaku wangka kutjupa wangka kutjupa. Kaya mulapaṭu kulira mayatjaku

tjukurpa walkatjunu anangu uwankaraku Jew tjutaku kuлу alatji,

Panya Aimantu tjukurpa nganmany tjju walkatjura iyanu anangu tjutakutu ngayuku initjara tjana kulira tjintu kutjungka Jew tjuta pungkula wiyanjtaku. Palu kuwarina Jew tjutangka wangkanyi alatji, “Tjintu nyara palula kutjupa tjuta nyuranya pungkunytjikitja pitjanyangka nyura uti tjananya wantinytja wiyangku pulkara pungama. Uti nyura tjunguringkula pañanma kuñata winki munuya pitjanyangka nyakula tjananya uwankara pungkula alatjitu wiyanma munuya tjana kanyintja uwankara mantjira katima.” Alatjina nyuranya mulamulangku wangkanyi nyura wankaringkunytjaku.

Alatjiya walkatjara tjutangku mayatjaku tjukurpa walkatjunu Mutukailu tjakultjunkunyangka. Munuya walkatjura wiyingkula mayatjaku ini tjaru walkatjunu munu palumpa walka kuлу tjampamilañu palumpa ringingka. Munuya palulangguru mayatjaku warkaripai kutjupa tjuta nyiri palunya tjananya unkul’yanu, kaya nyanytjungka tatiña warpungkula katingu tawunu winkikutu.

9

1-32 *Ka tjintu panyatja wirkanu panya Aimantu Jew tjuta pungkunytjaku wangkanytjitetja. Palu Jew tjuta tjunguringu tjanampa mirpantju tjuta pikangku pungkunytjikitja munuya pungkula uwankara wiyanu Jew tjutangku. Panya mirpantju tjuta kuñpu wiya nguwanpa munuya*

nguluringangi tjanampa, panya mayatjaku warkaripai tjutangku tjananya angatjunkunytja wiyangku wantir'iyanu, ka tjana tjuta mulapa pungu panya anangu nguratja tjuta.

Ka palula malangka Jew panya tjuta pulkara pukularingu munuya ngura winkingka mai pulka palyara tjunguringkula ngalkuningi. Munuyanku kutjupa kutjupa tjuta mantjira kutjungku kutjungku ngapartji-ngapartjingku ungangi pukularira.

Munuya palulanguru yiya kutjupa yiya kutjupa tjintu panya paluru wirkankunyangka mai pulka palyara ngalkupai ara panya palunya kulintjikitjangku.

10

¹⁻³ *Ka mayatja panya pulkangku Mutukainya mayatja tjunu palula itingka mayatja nyinanytjaku. Kaya Jew tjutangku pukularira Mutukainya wanganarangku kulilpai, panya Estherlu pula kutararangku tjananya mayatjangka anga-wangkara wankakutunu.*

**Tjukurpa Palya
Portions of the Holy Bible in the Pitjantjatjara
language of Australia**

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 11 Nov 2022 from source files dated 22 Nov 2019

b29b7786-0954-5b75-82cb-3657182b63d6